

C40-4514



四童子三昧經卷上

隋天竺三藏法師闍那崛多譯

哀泣品第一

如是我聞一時婆伽婆在俱尸那國力士居地娑羅
林所二雙樹間爾時如來思惟今日涅槃時到應當
取滅長老阿難即於其夜欵得惡夢驚怖憂惱馳向
佛所愁慘合掌瞻仰世尊目不暫捨爾時佛告長老
阿難瞿曇彌子何故如是熟視於我眼不暫瞬爾時
阿難即白佛言世尊我於昨夜忽然夢見身毛為豎
甚大怖懼必是如來涅槃先相世尊我既見是非吉

C40
4514
43



B 64853



夢已心無情賴深生憂惱恐畏世尊速入涅槃佛告
阿難瞿曇彌子汝見何夢知是如來涅槃先相而生
驚怖爾時如來卽以此偈問阿難曰

汝夢何所見 在娑羅林所 謂涅槃先相
彼相爲我說

爾時阿難卽以偈頌白世尊曰

昨夜所見夢 可畏身毛豎 恐怖心大驚
世尊今當聽 忽於世界中 出生廣大樹
微妙甚可觀 常有諸華果 普覆衆生界
其陰甚清涼 若蒙在樹下 受樂除憂患

觀樹得淨眼 聞聲得淨耳 成就多功德
高至於有頂 彼樹出妙聲 具說諸法相
微妙義具足 安樂諸衆生 彼樹出光明
如恒河沙數 充滿如是刹 所照無不徧
諸有十方界 無量難思議 光明所觸者
必當得利益 彼樹出妙香 普熏十方刹
若聞此香氣 不墮諸惡道 亦不墮地獄
及不墮畜生 餓鬼阿脩羅 皆至於善趣
如是大妙樹 安樂諸衆生 摧折力士地
臥於雙樹間 爾時千數衆 無量不思議

見此大樹倒 悲號而哀泣 忽不聞彼聲
 亦復不聞香 各不能自起 我亦迷悶倒
 我昨夢如是 無量可畏相 如我所見事
 具眼為我說

爾時淨居諸天子及娑婆世界主大梵天王并商主
 魔王子天主憍尸迦四天王等并諸眷屬各於住處
 聞佛世尊涅槃之相各及八十餘那由他眷屬諸天
 子等前後圍繞往詣佛所頂禮佛足皆悉同聲悲號
 懊惱憂愁泣淚即向阿難而說偈言

嗚呼大苦哉 阿難汝具知 如來雙樹間

欲取於滅度 無燈為作燈 無歸為作歸

欲入於寂靜 無餘大涅槃
 爾時世尊向慧命阿難及諸天眾而說偈言

汝賢莫憂苦 如所見無異 今夜取涅槃
 在於雙林下 彼之大樹者 枝莖不思議
 具光明香氣 摧折雙樹間 如樹佛亦然
 今欲詣彼所 入無餘滅度 如水滅大火
 舍利目連等 神通智慧最 二人已滅度
 汝今豈不知 諸行皆如是 無常生滅法
 佛知如是相 知已為眾說 阿難汝當告

我諸聲聞等 上座尼樓駄 天眼最第一
上座迦旃延 上座俱絺羅 富樓須菩提
難低及牛齡 輸那模伽王 著糞掃衣者
難陀羅睺羅 又餘諸聲聞 學無學人等
及諸餘凡夫 一切速告知 不久我滅度
勿於涅槃後 而生彼苦惱 有學及凡夫
不見大生苦 我慰喻彼等 曉示真法相
諸行皆如夢 無常汝莫憂
爾時世尊如是說已 慧命阿難卽以偈頌白世尊曰
世尊我迷方 舉身皆戰慄 聞佛欲滅度

我愁憂不少 體衰無歡喜 心益增悲悼
離欲亦如是 具眼云何去 云何告上座
天眼第一者 今日大悲尊 見已更不見
我今自憂苦 云何告彼苦 上座云何聞
苦惱大怖事 學人云何住 及餘諸凡夫
憂悲箭所射 願尊住一劫 云何於四衆
宣說世尊滅 世尊爲我說 願尊住一劫
大炬逝速疾 滅沒於世間 世間大黑闇
世間永盲冥 我不能告彼 世間大苦事
世尊更遺餘 無有憂苦者

佛告阿難曰瞿曇彌子汝莫憂苦諸行法相悉皆無常爾時世尊卽說偈言

阿難億諸天 聞佛欲涅槃 悉捨天宮殿

憂愁大苦惱 侍者汝正業 汝去告比丘

我涅槃之後 懊惱不見我

爾時慧命阿尼樓駄在須彌山頂爲三十三天正當說法是時卽以清淨天眼過於人眼觀見大威德諸天子等捨於宮殿復聞諸天叫喚大聲悲號啼哭復見已之徒衆眷屬悉皆四散時阿尼樓駄正念甚深天眼之明重復觀察諸天子等各及眷屬捨已欲樂

憂悲苦惱速疾捨離相續而去時阿尼樓駄更復觀見須彌山王及諸山峯或高百由旬或二百由旬三百由旬四百由旬摧剝崩倒或五百由旬或復無量須彌山峯崩倒墮落大海水中於彼衆生無所損惱亦無傷害尚不損惱於一衆生況多衆生亦不傷害於一衆生況當傷害於多衆生彼須彌山王所有依住天龍夜叉捷闍婆阿修羅緊那羅摩睺羅伽聞於如來欲入涅槃悉皆憂悲生大苦惱同時趣向俱尸那城速疾急行當速行處須彌山峯而自崩倒音響震動並出聲音今大釋種釋迦牟尼釋中勝王於阿

僧祇億劫苦行修諸善根今於力士所生之地娑羅
林所在雙樹間欲入無餘寂滅涅槃諸天人等皆當
眼滅彼皆怒遑疾而行大須彌山及大海水皆悉
擾動以是事故此大須彌山王之峯及大山谷崩倒
墜落沒入大海爾時阿尼樓駄正住須彌山頂卽發
大聲而說偈言

世間大商主 衆生大福田 與世間樂報

此仙今涅槃

往昔能作大功德 是大醫王治衆病

拔刺無礙無所著 彼仙今欲入涅槃

見諸衆生多欲患 輪轉無明生老死

處在牢獄顛倒見 起大慈悲爲說法

動諸魔衆瞋恚來 猛毅鋒刃欲加害

或執大石及山崖 示現種種恐怖事

如是等衆甚可畏 見之身毛不驚動

彼尊能破如是魔 今欲入滅雙樹間

右手舒展指於地 震吼聚落及諸山

彼仙自在大法王 今欲涅槃雙樹間

能打大地出大聲 聞不思議十方界

彼勝衆生大智者 今欲涅槃雙林間

昔魔兵衆大可畏

已得難動無畏處

彼大仙人爲衆說

轉於四諦大法輪

現諸神通無與等

一切世界置毛端

衆生不知亦不覺

彼尊今欲入涅槃

今已到於力士地

在於娑羅雙林間

入大寂靜三昧中

欲趣涅槃如火滅

爾時尊者阿尼樓駄說此偈已以佛神力闍浮提內
所有比丘比丘尼優婆塞優婆夷唯除上座摩訶迦
葉及諸弟子彼衆眷屬自餘二百四比丘衆諸餘所
有四部衆等馳聚娑羅雙樹林間同來聚集禮世尊

足各作是念我等今者卽是最後覲見世尊時阿尼
樓駄說是偈已應時三千大千世界所有大威德諸
天人等及諸天天子天女諸龍龍子龍女及諸夜叉
夜叉男女毗舍遮毗舍遮男女一切諸天人阿修羅
迦樓羅緊那羅摩睺羅伽人非人等星宿行處如是
等一切大衆皆悉號咷流血灑地面淚滿目心皆迷
毒叫喚舉聲哀慟大吼駭動天地憂箭所射心無情
頽惋歎感傷嗚呼咨嗟諸根悲塞頓悶斷絕宛轉于
地舉身顛慄手足垂跏受大苦惱其間或有相視而
哭或以手拳自拍頭頂齔裂軀面而大號哭或有轉

經 四童子三昧經卷上 十
眼或復轉膝而大號哭或按兩髀如燒脚足而大號
哭或復唱言嗚呼佛陀嗚呼佛陀而大號哭或手拭
眼或手澀面而大號哭苦箭入心號哭哽絕哀痛悲
惱不能自定而大號哭如是無量千億衆生淚墮如
雨長噓歎息絕而復蘇或合掌爪涕淚交流而復號
哭或以右手支頭涕淚低頓躡地而大號哭或以左
手扣頭悵怏憂火所燒而大號哭或身體萎悴宛轉
煩寃而大號哭或擲兩手面失本色迷悶哽塞而大
號哭爾時彼諸天龍夜叉乾闥婆阿修羅迦樓羅緊
那羅摩睺羅伽各及眷屬馳趣佛所到佛所已在於

佛前皆悉撲地如斫樹倒或禮佛足或大叫喚或大
號吽宛轉于地或在佛前舉雙兩臂遞相攀攣叫喚
號哭並唱是言嗚呼佛陀嗚呼大尊嗚呼達磨嗚呼
大慈嗚呼大宅嗚呼大歸憐愍我等救護我等三界
之眼失路示路一切世間當成空曠一切衆生當盲
無目大智炬明今日永滅互相執挽如喪父母親戚
兄弟姊妹兒女如是種種號吽悲哽呼聲大哭或如
是言嗚呼我尊嗚呼我等大善知識嗚呼巧說微妙
美言嗚呼行步如師子王嗚呼行步如大牛王嗚呼
行步如大象王嗚呼演暢甘露法王如是種種無量

哀辭悼傷痛切而大號哭或從虛空撲身墮地悶絕
宛轉悲哽號哭爾時阿難悶絕撲地如斫樹倒良久
乃蘇在於佛前兩手據地瞻仰世尊目不暫捨而說
偈言

倍生我苦惱	以見衆生等	被苦箭所射
悲號大哭泣	譬如絕暗路	商人被劫賊
忽見大火明	照於衆人前	更增彼大怖
無方得馳走	觸處無依怙	以見火聚故
以如來滅度	多衆皆悲苦	如是無救者
更被苦箭射	世尊不住世	餘者復涅槃

最勝人滅度	我見云何忍	放熾大光明
如薪盡火滅	墮於力士地	我云何忍見
今更不復見	在於竹林下	及在祇陀園
如常說法時	云何入毗耶	離車最勝城
向諸離車語	最勝人滅度	云何入迦毗
釋種最勝城	告彼不喜言	最勝人滅度
云何詣闍世	摩伽陀勝王	云何說此言
如來入滅度	多數千衆生	數數而哀泣
云何慰除彼	釋師子滅度	比丘比丘尼
及諸在家衆	云何告此言	汝釋王滅度

或在經行所 及入大禪定 天龍所問時
無畏云何說 阿難佛何在 福田最勝人
諸上座問已 世尊我何報 我爲誰敷設
師子大法座 復爲誰敷設 大師子臥牀
衆中無所畏 如大師子吼 復更誰邊聞
甚深無比法 與誰洗足水 爲誰執袈裟
最勝人滅後 更爲誰執捉 誰復大衆前
讚歎我勤劬 誰復讚歎我 多聞大智海
智慧大辯才 無邊衆歡悅 我更對誰聞
微言輒美言 彼聞持佛子 如是傷歎已

在於佛足邊 悶絕而倒地

爾時世尊告阿難言瞿曇彌子莫過愁毒莫大迷悶
我於前時已曾語汝如此之義一切恩愛悉有別離
一切諸行並皆無常如夢如幻如焰如泡如沫如露
虛妄不實諸行亦爾汝已知之瞿曇彌子汝時可起
但當速去可爲如來於雙樹間安置牀鋪頭向東首
高如牛頭面正向北右手支頰雙樹之下偏約南邊
如來世尊今後夜分當入涅槃滅除無餘有爲身分
此之涅槃爾時阿難啼哭悲咷愁毒懊惱淚下滿面
奉世尊勅敷師子牀於彼娑羅雙樹林所舒安訖已

而說偈言

我今最後設 大仙師子牀 於後更不敷
最勝人臥鋪 我云何忍見 空林雙樹間
最勝人滅後 寂不見世尊 諸護林神等
空守於長夜 更不見如來 云何樂住此
嗚呼無常行 如幻如夢泡 丈夫教導師
今日當滅度
爾時尊者阿尼樓駄卽便說偈告阿難言
如來先已說 諸行悉無常 因緣不自在
汝強心莫憂 豈以汝憂悲 及以啼哭故

無常事已爾 智者莫迷悶

說此語已是時阿難卽復以偈報大尊者尼樓駄言
無畏尼樓駄 願莫作是語 觀勝人滅度
尊豈無憂愁

是時尊者阿尼樓駄復更以偈報阿難曰

我眼豈無淚 爲之以裁忍 見萬類衆生
多爲愛所逼 又我天眼見 諸苦惱衆生
爲彼等大悲 是以應號哭 爲利於世間
不以懊惱故 是故我語仁 莫憂當念法

現生品第二

爾時世尊從座而起一切天人諸龍夜叉乾闥婆緊
那羅摩睺羅伽阿修羅迦樓羅等百千億衆圍繞世
尊請娑羅樹林至已右脇卧師子牀世尊卧彼師子
牀已時虛空中卽雨天華及天末香作諸天樂億百
千種又齋世間種種香華種種末香種種塗香種種
音聲供養世尊植諸善業各口唱言此是世尊多陀
阿伽度阿羅呵三藐三佛陀最後而卧亦是我等最
後觀見世尊於彼刹那羅婆牟侯多間是時東方有
一世界名寶鳴主去此佛刹十千俱胝彼國土中有
佛名曰師子鳴聲多陀阿伽度阿羅呵三藐三佛陀

其世界中有一菩薩名善思義從彼應託來到此土
王舍城中摩伽陀國韋提希子阿闍世王宮內化生
結跏趺坐彼既生已說此偈言

我從師子吼 如來刹土來 聞此有世尊

釋師子在世

爾時空中有一天子以偈報彼善思義菩薩言

今者彼人王 世尊釋師子 於娑羅雙樹

欲入於涅槃

說是語已時善思義菩薩摩訶薩卽便以偈報彼天
言

經 阿闍世王緣經卷下 七

難計諸佛利 百千俱胝數 我從彼土來
聽釋師子法 值彼欲滅度 當趣雙樹間
我不實空來 到於斯刹土 我今已來此
彼尊當涅槃 諸天等世間 悉愁況於我
一念此不住 應速見世尊 勿令我空來
而不得見佛 善思義勸諫 摩伽陀國主
發哀美善言 令彼心歡悅 大王聽我語
大人出世間 王莫放縱心 速詣於佛所
於數千億劫 或當一遇時 今旣值彼師
智者莫空過 願王勿疑意 謂我小兒癡

我非癡小兒 王自小兒耳 貪於世欲樂
殺父造逆殃 此是小兒癡 當墮於惡道
王近惡知識 調達鬪亂人 隨順彼逆心
故殺無過父 王如法無比 真是佛子儔
但以有我心 無智故興逆 如此大惡逆
恐怖事非輕 以是王必當 墮大阿鼻獄
及佛今現在 未入涅槃間 當興供養心
佛諸舍利骨 願王施歡喜 我欲詣佛邊
來生此土中 不爲受諸欲 我以聞本土
師子鳴如來 稱此大仙人 猶師子滅度

欲得奉見故 來生此土中 諸刹利宗親

一時請向佛

爾時阿闍世王即以偈告彼童子言

力士生地去此遙 不可輕往須嚴駕

童子汝但今夜時 明整兵馬安樂行

爾時善思義童子還復以偈報阿闍世王言

大王慎莫生懶惰 我神通力不思議

我今若欲過東方 無量佛刹無限礙

吾從所來佛刹土 經歷無量無有邊

其間佛國如恒沙 力士生地竟何遠

爾時童子從阿闍世懷裏而起徒步而行發王舍城

安詳而出說此偈言

欲觀清淨無過佛 大力能降最勝人

汝等隨我速往見 反彼釋仙未入滅

爾時童子從王舍城徒步出已當彼刹那羅婆時頃
有於七萬二千人眾集聚圍繞復有無量無邊百億
那由他諸天眾隨彼童子往詣佛所為欲頂禮如來
足故爾時世尊作大師子右脇卧已於彼刹那羅婆
牟侯多間從彼南方去此佛刹五百千億佛之世界
有一佛刹彼佛號曰寶積善現如來十號具足彼有

菩薩名寂靜轉從彼刹沒於此世界閻浮提地舍衛城內生大居士似師子家即於初生而說偈言

於千數億劫 割捨其手足 挑眼破身分

斷截無量頭 妻妾男女等 一切諸財寶

於千億數劫 求無上菩提 為度諸羣生

布施廣修福 無量百億劫 彼眼者希有

爾時似師子居士以偈報童子曰

汝為是天龍 為夜叉羅刹 汝即生之頃

分明出語言 我眷屬悉怖 馳走散諸方

我聞佛名聲 是故我不走

爾時童子以偈報居士言

我非天非龍 非夜叉羅刹 汝居士不知

謂我是世人 亦天龍夜叉 緊那摩睺羅

我是天中天 居士汝當知

爾時似師子復以偈答童子言

我心復有疑 童子我復驚 聞汝如是言

同於智者說 云何天及龍 夜叉緊那羅

云何天中天 童子更重說

爾時童子以偈報居士言

去此南方界 有佛名寶積 現在如師子

我從彼處來 百過作帝釋 自在亦作來
 百過作梵天 亦作轉輪王 我欲多時說
 一劫或億劫 不可得說盡 知者速詣佛
 唯然大居士汝常應修如此法行親近心念廣作顯
 示大居士何者法行如來當說彼寶積善現如來十
 號具足有諸菩薩摩訶薩等成就三法於菩提心行
 不退轉復當速證無上菩提何等為三一者入無邊
 心二者入甚深智三者入堅固修行三昧爾時彼童
 子欲重宣此義而說偈言

若欲入於甚深智 諸天世人所愛重

唯有諸佛大名稱 善能知因及非因
 彼句無非菩提者 此智無有染著處
 捨諸著已離毒箭 證法智已得作佛
 念心無邊無有心 入如是心得寂靜
 隨順是心名為入 此心名為徧一切
 若破若研彼不堅 無破諸法如來說
 諸有猶如虛空體 如是真如如金剛
 應知如是自性空 若能修此無所著
 彼即出離煩惱網 當成正覺離諸有
 當知一切無有知 當證一切無所證

當覺一切無所覺

一切聞聲無所著

入甚深法無法想

解脫衆生無脫想

廣寂無有廣寂想

得證菩提無道想

彼真健人除毒箭

了達衆生諸所趣

知一切故名爲佛

難可輒近無所著

爾時童子說此偈已於刹那羅婆牟侯多時似師子

居士卽與眷屬二百人俱左右圍繞便發阿耨多羅

三藐三菩提心廻向菩提於諸法中得無生忍十八

億諸天子等亦發阿耨多羅三藐三菩提心究竟菩

提無有退轉復有四那由他衆生於諸法中遠離塵

垢得法眼淨爾時童子復說偈言

我今不空來

往釋師子所

於生死怖中

度那由他衆

有多衆生數

已發菩提心

住無上平等

證得無生忍

我父住法忍

我母兄眷屬

十八億諸天

皆住菩提道

我得大財寶

無量不思議

於佛法轉近

去貧窮稍遠

爾時寂靜轉童子化其父母及眷屬已出舍衛大城

共其父母并諸眷屬無量百千諸衆生等左右圍繞

在於衆前趣向力士所生之地娑羅林所欲禮佛足

觀見世尊爾時如來在於師子林上右脇卧時於彼
刹那羅婆牟侯多時西方去此過八億百千佛刹有
佛名號樂音如來十號具足彼佛刹土有一菩薩摩
訶薩名無攀緣從彼佛刹隱滅身已於此佛刹閻浮
提地波羅柰國大城之內有大居士名善鬼宿於其
家內而忽化生時無攀緣童子卽於生時而說偈言
諸法無攀緣 愚癡覺所轉 彼不脫衆生
增長諸憂惱 諸法無處所 求之不可得
若盡及不盡 一切無所有 虛空無所依
非空亦無依 空法因緣無 因緣亦不無

彼諸所說法 深隱難知見 頗有能說者
人尊釋師子 大象大師子 如梵無諸欲
今日於雙林 將滅世間眼 在於大衆中
如月十五日 爲衆說妙法 彼更不可見
比丘衆圍繞 如帝釋山頂 自今更不入
一切諸妙城 天人中極尊 法鼓最勝者
發音令衆悅 我等不復聞 無我無作者
如來說是法 今欲入滅度 娑羅雙樹間
爾時無攀緣菩薩說此偈已波羅柰城一千徒衆作
如是言此童子者甚奇希有智慧辯才無畏深入生

已乃能憶知宿命生生之事復能巧說種種妙偈乃
有如是大力智慧無畏難伏淨妙辯才願令我等得
如是智若此童子爾時無攀緣童子欲令大眾入不
退地世間所無不共之法希有難得無量無邊令彼
得人亦令得人無生法忍爾時大眾白童子言善哉
童子我等今者隨童子去往詣彼所覲見世尊并欲
供養爾時無攀緣菩薩摩訶薩共彼眷屬徒眾百千
圍繞恭敬在於彼前從波羅奈大城而出徑詣佛所
爲欲覲見及供養故爾時於彼刹那羅婆牟侯多時
從於北方去此佛刹過六萬四百千億佛土有佛名

曰住菩提分轉如來十號具足於彼佛刹有菩薩摩
訶薩名曰開敷神通德從彼沒身生此刹土閻浮提
中毗耶離大城大將師子於彼家內忽然化生爾時
開敷神通德菩薩摩訶薩生彼家已卽說偈言

頗聞佛世尊	增長釋種家	度脫諸厄難
無量百千億	頗聞佛世尊	無邊智慧海
精進及禪定	甚深達彼岸	如來拔毒箭
得忍心調柔	爲衆常說法	亦不著法相
頗聞佛世尊	不著於三界	世間行不行
智慧徧一切	欲界及色界	乃至無色界

能以智稱量 彼眼者在不
特大將家有一天女名轉菩提分化作人形現童子
前以偈報童子言

世尊住一劫 或復過一劫 汝後當見佛
今且受五欲 食勝妙福祿 猶如大王家

種種妙音聲 歌舞作倡等

爾時童子具知如來已益衆生諸天人等善根成就
以偈報天女言

彼愚癡衆生 樂於五欲樂 不聞正徧知
及諸佛教法 我不受五欲 五欲無堅牢

五欲如刀劔 誰能信五欲 猪狗及野干

驟馬牛驢等 此輩貪五欲 諸佛聲聞訶

盲瞎根殘缺 錘陋及攣跛 如是等貪欲

諸佛聲聞訶 蚍蜉蚊蝶蠅 俱翅羅孔雀

如是等行欲 我勝彼故訶 譬如大火坑

熾然間浮滿 彼如盲墜墮 貪欲亦如是

諸欲無常苦 智者所訶責 若人不知過

此等爲欲轉 我不受五欲 世尊已證知

能聞此義者 當知彼如佛 我從佛邊聞
彼須彌山王 於後夜分時 彼佛當滅度

我等速往詣 盡諸結使者 欲見者可去
 恐彼世尊滅 轉菩提分尊 最勝人所說
 於億千數劫 難逢種善根 若於涅槃所
 觀見釋種尊 聞釋師子法 當生善種子
 若天人夜叉 往至如來所 若愛釋種子
 速見大名稱

爾時開敷神通德童子菩薩摩訶薩說此偈已與諸
 衆生無量百千左右圍繞最居衆首從毗耶離出徑
 詣佛所欲禮佛足親觀供養
 四童子三昧經卷上

校訛

第一紙五行南藏字一作第十紙五行南藏字一作

第十紙五行南藏字一作第十一紙五行南藏字一作

第十四紙九行南藏字一作第十六紙十六行南藏字一作

第十九紙十五行南藏字一作第二十紙十三行南藏字一作

音釋

歛許勿切瞬舒閏切齡丑之切慄力質切摧摧切剝摧切

折也剝北毅魚既切吡徒刀切吼呼后切駭楷下

角切落也恹烏貫切啞啞於六切顛戰掉也

也驚恹烏貫切啞啞於六切顛戰掉也

跖多可顰居縛切髀部禮切拭賞職切捫莫奔切

躡必益切躡地謂足不萎悴萎於為切枯也悴遽

特計切龍眷切挽無速切挑他凋切截昨結切瞻

許鑄切祖禾切比紙頰切野秀光切截昨結切瞻

煖魚頭切比紙頰切野秀光切截昨結切瞻

音韻

策十六策南南策二十策南南

策十四策南南策十六策南南

策十策南南策十一策南南

策一策南南策十策南南

梵音

四童子三昧經卷中

隋天竺三藏法師闍那崛多譯

四童子品第三

爾時世尊右脇卧於師子牀上時四童子從四方來各與大眾前後圍繞導在眾首悉皆平等智慧神通威德法行無所差別不乖毫毛共趣佛所往到佛前恭敬合掌彼四童子到佛邊時各隨城邑所從眷屬一切天人百千眾雜類皆悉合掌一切靜心歡喜踊躍曲躬瞻仰向四童子彼四童子當於來時四方縱廣滿一由旬諸天雨華徧滿於地鼓天音樂種種

百千諸天歌詠讚歎無量爾時多陀阿伽度阿羅訶
三藐三佛陀普於四方自然顯現四師子座爾時尊
者阿難以偈白佛言

世尊何因緣一切智四邊右脇現四林

師子廣大敷

作是語已佛告阿難阿難汝見此四童子已不從四
方來面如滿月過日光明蔽四天下威德特尊齒白
明耀發智慧光得大精進入甚深智成就功德識智
了達有深信行謙卑慚愧行業滿足意見深遠得正
念定智慧善巧有大方便第一總持爲諸衆生隨順

說法增長善本於無量億百千佛所種諸善根各住
四方各於佛刹聞我涅槃各從刹諸如來所諮發
起請生此刹土欲聞見我及我名稱說法利益功德
之事觀看今日如來後夜分時於力士生地娑羅雙
樹間當入無餘涅槃不思議涅槃一切世間無等涅
槃一切世間希有涅槃一切世間安樂涅槃一切世
間難伏涅槃一切世間斷離諸趣清淨涅槃如來當
取如是微妙最上涅槃阿難此東方來童子者其色
微妙具大功德端正可喜光明徧照威德熾然猶如
盛火放大光明以多百千徒衆圍繞及以億數諸天

之衆所以供養受天雨華來詣佛所欲供養佛阿難此童子者於彼師子音鳴聲如來國王曾作轉輪聖王領千世界而得自在諸天人等之所供養彼治化時於欲界天上及於人間恒多講法受持句義爲於無量百千衆生解說妙趣成就彼等種種善根得諸神通達解法行衆聖咨嗟無邊無斷最上微妙得無畏力深入法相成就辯才智慧善巧得行到無邊智慧彼岸滿足如是諸法行已於十八億年如法治化不用刀杖惱亂衆生不爲愛欲貪於王位於彼十八億年成熟十八那由他衆生令住阿耨多羅三藐三菩

提於菩薩法得不退地彼善男子從初發心得不退地已乃至畢竟成就阿耨多羅三藐三菩提彼王如是於後一時剃除鬚髮著袈裟衣捨家出家卽出家已於八十一億年行於梵行從出家已未嘗坐臥況復睡眠於八十一億年中乃至不起一念欲想及於瞋心況有殺害惱亂等心無不善事及憎愛想亦復不念修行不修行想常住二法何等爲二一者雖得肉眼無肉眼想雖能分別知諸法聚而不取著法聚之想於彼八十一億年中更不論說諸無利益他餘事想若地想水想火想風想若虛空想及識想若婦

女想及丈夫想飢渴想聚落想空閑處想城邑等想
違逆之想不違逆想遠離想禪定想自我想他我想
色想無色想想邊想中想生想滅想少想多想如是等
諸餘亂想皆悉寂滅不生分別唯除世篋藏法本思
量修習其間成熟八萬那由他衆生決定於阿耨多
羅三藐三菩提彼諸衆生皆初發心於如此刹卽刹
那羅婆時於彼佛刹自在而去各更別往諸餘佛刹
到彼諸刹世尊所奉覲承事於彼世界一一佛刹一
一身到一身一事無二並者彼諸刹土一一諸佛皆
同於此一刹那羅婆時右脇而臥同於此日後夜分
中當入涅槃悉在娑羅雙樹之間力士生地地皆如如
來彼諸佛等同名釋迦牟尼十號具足彼諸佛等亦
同出於五濁惡世阿難我以如是無量無邊無礙肉
眼正知正見非諸聲聞辟支佛等之所能入非境界
故阿難若有比丘比丘尼優婆塞優婆夷聞此法門
聞已生信羨我肉眼正知見智欲得此智乃至滿足
一切種智及發一念正信之心相續不捨適發心已
卽生無量福德之聚況得無量無邊大功德聚阿難
若有善男子善女人於十八那由他諸如來所復於
十八那由他億年以一切樂具供養恭敬尊重讚歎

親承奉事彼諸如來於十八那由他年所得功德雖復無量猶故不及聞此法門羨願之心生功德者不可譬喻阿難此童子者於我法中一日一夜教化利益無量衆生何況多時所作利益若舍利弗目犍連等及餘聲聞不能如是多作利益度脫如是無量衆生阿難假使汝等一切壽命多諸衆生說法教化不念餘事晝夜不休雖作如是教化利益但自汝等於我法中不能荷負佛法重擔如今所見此來童子所荷負者又復告言如是阿難如是童子爲諸衆生作大利益具足憐愍念諸衆生饒益衆生而此童子有

無量功德阿難汝見從南方來童子已不如秋滿月十五日夜光明熾盛右手執持衆寶莊嚴杖打此大地打大地已出如是聲譬如摩伽陀國有一寶器或用金作或用銀作作之成就善加瑩治無有塵垢無有瑕隙無有破漏善好明淨無有塵土無有脂膩種種因緣衆事所成種種功能鍊精明淨五處具滿十處遠離一千分觀瞻遠離十二處金銀煩惱種性真正金性最勝百鍊所成新成非故具足八分一千巧匠一心觀瞻塵膩垢翳一切悉無如是妙器打之出聲若聞聲者能滅衆苦阿難如是譬喻如是器聲我

少說耳而此童子衆寶間錯嚴潔之杖打此大地所
出之聲亦復如是阿難此童子者名寂靜轉是大菩
薩摩訶薩也從南方寶積現多陀阿伽度阿羅訶三
藐三佛陀刹土而來彼佛世界名寶莊嚴阿難於汝
意云何彼世界何故名寶莊嚴阿難彼佛世界無一
衆生住不定者亦無邪定阿難彼諸衆生皆悉正定
於阿耨多羅三藐三菩提阿難彼刹是菩薩刹彼刹
衆生無男女想阿難彼諸衆生皆悉梵行無諸穢欲
智行清淨乃至無有穢欲之名阿難彼莊嚴佛刹諸
衆生等無有一切不善思想亦無食想唯有二食何

等爲二一者以定慧爲食二者以法喜爲食阿難彼
佛刹不說五陰不說三乘唯廣演說一切智陰菩薩
篋藏阿難以是義故彼佛世界名寶莊嚴阿難此土
所有他方佛刹衆生生此土者復有願生彼佛土者
願生之者彼衆生等皆得不退轉於阿耨多羅三藐
三菩提阿難或有菩薩從餘佛刹來生彼者生已卽
自能知彼佛刹內一切諸事彼等菩薩示生彼已卽
於刹那羅婆牟侯多時各各想已自身是佛阿難彼
寶積現如來爲彼無量無邊那由他諸菩薩摩訶薩
等廣說一切種智及菩薩篋藏法門不曾斷絕更不

說餘阿難假使我於無量千劫說彼佛刹功德之事
及一一分別菩薩摩訶薩等所得勝法所謂發願莊
嚴佛刹不可得盡阿難我但略說彼佛世界功德名
字此寂靜轉菩薩摩訶薩從彼方來爲欲看我入般
涅槃復爲憐愍無量無邊諸衆生等令發無上菩提
之心復爲欲顯彼刹功德莊嚴之事復爲顯彼寶積
現佛利益名稱所謂顯諸菩薩法行大事亦說真實
名稱之事欲令此刹無量無邊諸衆生等攝受正法
故來到此釋迦佛刹爲令未來諸菩薩等生歡喜心
阿難此童子者於往昔時行菩薩行值然燈佛出現

於世爾時曾作轉輪聖王名曰降怨阿難爾時降怨
聖王爲無量億無邊衆生說於正法成熟善根時彼
聖王從旦日初至於食頃化度三十六億衆生在不
退地於阿耨多羅三藐三菩提入正定聚證得無生
法忍而此聖王於彼然燈如來般涅槃後發大精進
剃除鬚髮捨家出家旣出家已滿一千年續然燈佛
轉正法輪然彼聖王利益無量無邊衆生作利益已
於後一時日沒之頃復化三萬六億衆生令住阿耨
多羅三藐三菩提還於日沒之時令七萬那由他衆
生皆悉漏盡成阿羅漢況當證道見諦學人不可稱

計阿難假使我欲以佛智慧說此寂靜轉菩薩童子
往昔之時爲諸衆生作利益事不可得盡阿難汝爲
此寂靜轉善男子就於我前敷座安置汝當得無量
無邊勝妙功德若有衆生聞此寂靜轉菩薩名者彼
等衆生如現在見佛等無有異阿難若有衆生聞此
功德莊嚴受記法本名字者乃至一念發淨信心爲
欲見彼寶積現如來多陀阿伽度阿羅訶三藐三佛
陀爲欲承迎禮拜親近供養有發心者欲聞法者阿
難我今皆與彼等授記往生彼刹奉覲如來聞於正
法彼佛刹中所生菩薩亦欲同行彼諸法行唯除願

力菩薩摩訶薩等阿難彼諸衆生善得大利若能聞
此所說功德莊嚴法本名字乃至經耳何況聞已得
淨信心阿難如是等法句如實不虛汝當善護善念
憶持所以者何阿難閻浮提人未曾得聞如是等修
多羅章句及以名字阿難若名字菩薩及謗法人如
是人等莫令得聞何以故以其謗法罪大深重故阿
難汝見西方如是輦輿衆寶莊嚴乘空而來汝見已
不阿難白佛言如是已見佛復告阿難汝見其間一
童子不二足神通變化所作騰空飛來動此大地動
大動震大地震動時所化衆生怖畏毛豎阿難報

言如是婆伽婆如是修伽陀我今見已此童子者神通遊戲種種示現乘空而來佛告阿難如此輦舉眾寶間錯在童子前而來出於種種異妙之香滿此佛刹阿難白言如是婆伽婆如是修伽陀佛復告阿難言此事還是彼善男子智力所現能使輦舉出是妙香阿難汝聽復能出於四種之聲所謂空聲無所有聲寂靜聲佛聲阿難白言如是婆伽婆佛復告阿難還是童子毛孔所出如是等聲阿難此聲出時有六十八那由他眾人大得饒益復于世界諸眾生數有多眾生于無爲法心漏永盡便得解脫阿難聞一佛

名已有九億菩薩住不退轉地得入聖道於阿耨多羅三藐三菩提於此刹土人天世界有二百千那由他天人得阿毗跋致地決定住阿耨多羅三藐三菩提阿難此善男子所住西方有佛名曰喜樂音多陀阿伽度阿羅訶三藐三佛陀世界名樂毛從彼刹來欲見如來入於涅槃此善男子然其來已爲於無量無邊眾生作大利益阿難今善男子來此刹時大作佛事亦如如來轉大法輪彼亦如是轉大法輪阿難此善男子乃至阿僧祇劫已來諸毛孔中恒常出此四種之聲所謂空寂等聲於一一聲中爲無量無邊

衆生作大利益阿難白佛言世尊此善男子往昔之時作何善根乃能於諸毛孔出如是諸聲佛告阿難我念在昔過去無量無數劫時有佛出世名無垢眼善逝世間解無上士調御丈夫天人師佛世尊此善男子於彼佛所出家作大沙門名曰智樂淨修梵行而彼沙門於彼如來聞於真理難知智慧甚深句義所謂不生不滅一切諸法空無所有一切諸法本性寂靜一切諸佛皆同一體而彼沙門七日七夜相續不斷不念疲倦不念餘事不捨重擔於此四句躬自受持善味諷習善持通利善意貫穿研精已行阿難

彼時沙門者此童子是也以此四句妙義億數諸佛所共說之入諸佛法攝諸衆生復自然得覺了之事而彼沙門愍諸衆生緣諸村舍聚落城邑爲彼說法阿難爾時法師智樂沙門者以多聞知法義趣復以真心六年爲他宣說如是法句以是因緣於阿僧祇劫從諸毛孔攝受如是出聲神通以是事故此善男子從身毛孔出如是四種法聲爲多衆生作大利益如是次第此童子者於阿僧祇劫身毛孔中成就如是四種妙聲阿難閻浮提人得大善利得第一利若聞此無攀緣菩薩名字者已獲善利况聞其法阿難

若有善男子及善女人或在天中或在人間聞此無攀緣菩薩乃至名号已得淨心所得功德不可思議何況瞻對得覲見者所以者何阿難此無攀緣菩薩摩訶薩於諸菩薩地已得功德不可思議不可稱說阿難而此菩薩摩訶薩故欲來見如來入般涅槃阿難汝今可爲彼大菩薩施設牀敷於如來前用擬此善男子坐阿難汝當得大安樂利益亦當速得勝妙神通阿難汝設此敷業因緣故所獲果報或坐或卧常得安隱於一念頃當現證得阿羅漢果無爲聖法阿難汝於無漏聲聞聖果未證入者我今與汝授記

當得汝復應有諸功德分迴向阿耨多羅三藐三菩提當得諸佛如來大法阿難若有比丘比丘尼優婆塞優婆夷若天若龍若夜叉若犍闥婆阿修羅迦樓羅緊那羅摩睺羅伽人若非人及餘衆生聞此寂靜轉所說授記聞已得淨深心及信解者若復有人欲得聞此寂靜說授記法門或如來邊聞或聲聞邊聞復能爲彼法師敷設牀座所得功德如彼法師坐此座上復當說斯寂靜說授記法門如斯無異所以者何阿難彼人敷設座已當得十種敷設功德何等爲十一者當得轉輪聖王座二者得帝釋座三者得梵

天王座四者得世主座五者世世於諸佛所得法師
座六者菩薩地滿既得位已在道場菩提樹下坐於
蓮華師子高座七者證一切智已得無上菩提坐於
佛座八者轉大法輪時得無量億數諸天所共莊嚴
轉法輪座九者欲現大神通時遇出一切諸世間道
爲得如來無上顯現最上神通師子高座十者欲現
入於涅槃時得彼多陀阿伽度阿羅訶三藐三佛陀
令諸天龍夜叉乾闥婆阿修羅迦樓羅摩睺羅伽人
非人等心生歡喜得清淨信最後寂滅一切諸行住
金剛三昧得如來座阿難汝當得如是等十種師子

高座果報阿難若有善男子善女人淨心聞此寂靜
說授記法本句偈之義爲於法師敷設法座愛敬尊
重彼法師故以是因緣爲彼成就十種師子敷座果
報以是義故阿難汝應可合掌向無攀緣菩薩邊汝
應當得大利安樂大福德聚因此功德汝速當得發
於神通爾時尊者阿難爲無攀緣善男子敷法座已
合掌向無攀緣菩薩摩訶薩生清淨心尊重心慚愧
心卽於爾時而說偈言

合掌向健兒 降伏龍入定 大智衆生者
無攀緣光明 得智及精進 智慧禪定聚

世間無等侶 向無畏合掌

爾時世尊以偈告阿難言

汝今敬合掌 供養無攀緣 所獲諸果報

我當爲汝說 阿難合掌敬 自我涅槃後

於村舍聚落 及我弟子間 於我入聚時

或出彼村落 及經行坐卧 一切威儀中

當作大佛事 汝於諸世間 所有衆物類

或識及無識 悉皆向汝邊 恭敬而偃身

若男若女天男天女及諸外道波利婆等若沙門婆

羅門若王大臣若國師若兵將及餘官屬若長者居

士自餘凡類但是有形乃至六畜象馬走獸及諸飛

鳥若見汝者皆得清信一切樹木藥草苗稼所有華

果悉皆向汝偃身恭敬一切臺殿屋宇重閣樓櫺却

敵竅孔車乘輦舉以汝福德威光之力覆蔽於彼皆

悉如是向汝偃身阿難譬如多陀阿伽度阿羅訶三

藐三佛陀初證阿耨多羅三藐三菩提得無礙解脫

時一切苗稼樹木藥草及諸華果乃至略說人非人

等周而充滿菩提道場皆向如來偃身恭敬阿難如

是如是汝今以此於無攀緣善男子邊合掌偃身因

緣力故汝於却後一切威儀隨所在處人非人等一

切苗稼樹木藥草皆當向汝偃身恭敬阿難若有善男子善女人於如來涅槃之後或於我今現前之頃須臾聞此莊嚴說授記法本乃至一合十指掌一念因緣或以真心思惟此義發一信心彼人尚得如是福報如我前說如是阿難當來之世少有衆生得聞此法亦復少有但聞如是法本名字若一聞再聞尚不可得何況聞已得真信心恭敬尊重不生誹謗滅除疑惑思惟修習生實想者我於如是善男子善女人等復以佛眼悉皆現見復以佛智悉皆現知如是人等非於一佛所修行供養非一佛所種諸善根阿

難今在此衆集會我前一切大衆天人男女故來欲見如來世尊入於涅槃阿難如是等衆於當來世彌勒菩薩初欲證於阿耨多羅三藐三菩提時受智位已後乃至坐於菩提道場設大供養尊重恭敬如是次第乃至彌勒世尊入涅槃時亦復觀看還於爾時在如來邊亦復得見此四童子如是聽法如今我前得見得聞無攀緣善男子於毛孔內廣聞大法微妙之聲得聞聲已生大歡喜是故阿難汝今得聞說如是等微妙義趣汝應數數偃身合掌淨心敬信所以者何汝以如是淨心敬信善業因緣所在之處一切

衆生諸天世人恭敬供養尊重讚歎躬偃汝邊乃至於汝涅槃之後諸天世人起塔供養汝之舍利爾時世尊告阿尼樓駄言阿尼樓駄汝見上界有四十億諸天人衆聞此經典皆悉合掌偃身而住阿尼樓駄白佛言如是婆伽婆佛復告阿尼樓駄彼天人等因聞此法信心合掌偃躬善根於未來世阿僧祇劫不墮惡道或在天上或在人間於恒沙世流轉生已一得作轉輪聖王一切生處恒值諸佛於諸佛所成就善根成善根已乃至得證阿耨多羅三藐三菩提同一名號名爲一切衆類偃身多陀阿伽度阿羅訶

三藐三佛陀說是語已時大衆中有諸力士及其眷屬各有五百其名曰娛樂力士頭俱耶力士大力力士天威力士勝天力士郁干蹉力士無畏力士婆藪力士眞實力士優多羅力士婆儂力士一切忍力士如是等一一力士各及眷屬五百圍繞聚集來會在其衆首爲欲供養向如來所皆半偃身合掌悲泣哀哽大叫流淚雨面而白佛言世尊我等今者爲欲供養如來世尊及無攀緣童子菩薩并餘無量大菩薩等乃至一切大德聲聞此修多羅微妙句義清淨法門爲供養故合掌偃身世尊我等以此一念善根廻

向阿耨多羅三藐三菩提爾時世尊即便微笑諸佛
法爾若微笑時卽從口出種種微妙雜色光明所謂
青黃赤白金色玻瓈放斯光已徧至無量無邊世界
光明所照乃至梵宮還來旋繞世尊三市從佛頂入
爾時慧命阿難見是事已卽以偈頌而白佛言

世燈何因放 如此大光明 善哉沃我疑
及餘衆生等

佛告阿難汝見已不此力士子一心集聚合掌向我
及無攀緣童子菩薩并於此經至心淨信復發無上
大菩提心阿難白言見已世尊佛復告阿難言此力

士子從今已後阿僧祇億劫不墮惡趣然後證得阿
耨多羅三藐三菩提爾時世尊欲重宣此義而說偈
言

阿難汝所見	摩羅子集聚	心生大歡喜
曲躬而向我	歡喜說此言	當得無上道
大智力士子	此等供養我	及於無攀緣
於法生尊重	我諸聲聞等	如是合掌已
阿僧祇劫數	常不墮惡道	因此合掌業
及向我曲躬	假令一劫說	或無數億劫
此等當證道	成就諸佛土	行於最勝行

其數不可測 於億數等劫 思量不能知
 阿難今不久 於此後夜分 吾共汝等別
 是最後相見

佛復告阿難阿難汝見從北方有大金光照曜來已
 不彼之威光映蔽一切其方所有樹木苗稼藥草華
 果山崖堆阜臺殿樓閣輦輿車乘人非人等於上虛
 空皆成一色所謂金色阿難白佛言如是婆伽婆佛
 復告阿難汝見北方復有七閻浮檀金輦輿從彼來
 不中央輦輿其上童子結跏趺坐威光最勝功德巍巍
 魏阿難白佛言如是婆伽婆我今已見佛復告阿難

北方去此刹土六十四百千俱胝有佛刹名曰俱蘇
 摩跋^{此言}多^華彼刹世尊號名菩提分轉多陀阿伽度
 阿羅訶^三佛陀彼佛刹中有此童子菩薩摩訶
 薩名曰華敷神通德從彼捨身來生此土阿難彼世
 界出諸法聲名曰菩提分音彼處衆生有聞聲者成
 諸善根阿難彼菩提分轉如來從證阿耨多羅三藐
 三菩提已來六十四劫現在說法阿難彼如來無
 有聲聞衆惟菩薩衆阿難譬如灌頂轉輪聖王多有
 諸子彼諸子等爲作大臣爲作國師爲作諸小國王
 如是如是彼佛如來諸菩薩等亦復如是亦名爲子

亦名大臣彼佛亦爾有二菩薩最爲殊勝於諸菩薩
獨爲侍者還以菩薩而爲僧寶阿難如是次第說彼
佛刹皆悉菩薩滿彼國界阿難彼佛世界貴生所須
皆悉豐足無所乏少具足無畏安隱快樂微妙可瞻
人民充滿菩薩功德皆悉滿足住諸神通最爲殊勝
以三昧力周旋往返猶彼朋友智慧之聚最爲殊勝
智藏滿足常能修習菩提之心常能講論一切智法
於諸菩薩一切深法無量無邊皆悉證得阿難如是
等諸菩薩摩訶薩滿彼世界彼佛刹中此華敷神通
德菩薩摩訶薩善男子來生此土閻浮提毗舍離城

彼善男子今現神通而來此者爲欲頂禮如來足也
又欲觀見如來世尊入大涅槃阿難此光明現者是
彼如來多陀阿伽度阿羅訶三藐三佛陀大威神之
力阿難所謂此七閻浮檀金輦輦者是彼如來七菩
提分助道法故爲作化現阿難此閻浮提有無量千
俱胝諸衆生諸天人等共此童子往昔已來同種善
根而此童子亦生此閻浮提時令彼衆生卽得歡
喜踊躍無量復有衆生當得漏盡或有衆生當得學
地或有衆生得無學地或有衆生未發菩提心者當
能令發菩提之心或有衆生發於本性不退忍心阿

難如此童子處中輦輦跏趺坐者所出光明此之光
明是彼如來神通威力之所現耳從此光明出生彼
之六輦輦也阿難汝看以彼如來威神之力此華敷
神通德菩薩摩訶薩能於此處現種種神通又此光
明之力於此世界能爲無量無邊諸衆生等作大利
益所謂以彼正法共相攝受爾時彼童子等悉皆和
合歡喜踊躍復與無量百千衆生前後圍繞於一刹
那之頃雨種種華詣向佛所到已頂禮佛足爾時世
尊告慧命阿難言阿難如來爲諸衆生所可作者及
如來長子諸菩薩摩訶薩等所應作者我於今者皆

已具足我爲衆生所作利益者今已作竟阿難此華
敷神通德菩薩摩訶薩在於閻浮檀金輦輦中儼然
而坐所作神通以如是等教化那由他衆生證於阿
羅漢果復教俱胝那由他數衆生已得學地復有百
俱胝數衆生令於三寶得生淨信受持五戒復有七
百俱胝諸天令得任於不退轉地決定當得阿耨多
羅三藐三菩提復有七俱胝衆生令住無生法忍復
有無量阿僧祇那由他俱胝衆生當令值遇彌勒世
尊初首法會

四童子三昧經卷中

校訛

第九紙十三南藏時

第十四紙十三南藏千

音釋

篋

苦協切

羨

似面切

荷負

荷合可切

房

音

瑕隙

瑕胡切

致

胡切

綺

綺切

輦

輦力展切

輦

輦並車名

阿毗跋致

阿毗跋致

致

致蘇切

躄

躄七何切

退轉

退轉

躄

躄蒲撥切

偃

偃於武切

窳

窳苦弔切

蹉

蹉七何切

躄

躄蘇切

儔

儔直由切

儔

儔直由切

儔

儔直由切

儔

儔直由切

新安居士汪可期同妻氏為保男汪鶴徵壽命延長施賞刻此

四童子三昧經卷中計字七千五百四十五

個該銀三兩九錢三分宛陵釋如生對上元陶邦本書戴伍刻萬曆丁巳歲夏六月徑山化城寺識

四童子三昧經卷下

隋天竺三藏法師闍那崛多譯

囑累品第四

爾時慧命阿難白佛言世尊惟願世尊或住一劫或減一劫憐愍此等諸衆生故所以者何如來多陀阿伽度阿羅訶三藐三佛陀若住世者知是大事常現於世又令是等真善大士數數往返闍浮提內我等衆生復應於此如許時間當見此等菩薩大士承事供養又於此時如是經典復應當得廣行流布復如許時我等得聞合佛法義如許時間令我得見如來

世尊及大士等種種現化神通之力若如來今日不住於世入涅槃者我等衆生於如來世尊滅度之後遠離三事何等爲三所謂不見佛不聞正法三者不見此等大士弘廣之心亦復不得承奉供養有如是失慧命阿難說是言已悲號大哭憂歎懊惱涕淚滿目宛轉在地如斫樹倒並唱是言我等速疾共佛別離諸善知識亦復別離爾時衆中有菩薩摩訶薩名曰善思義以偈白慧命阿難言

阿難莫憂惱 諸行悉無常 世法欲常者
此處不可得 若言有諸行 此言不可得

如是諸法空 汝今何憂苦 諸智皆悉空
於佛智亦空 佛尚不可得 汝今何憂愁
汝莫生分別 智者捨分別 諸有如虛空
如陽焰似水 亦如幻師化 象馬諸乘等
園林衆聚落 樹木諸華果 世諦亦如是
如幻化無實 諸佛及聲聞 亦如是不異
爾時慧命阿難以偈報善思義菩薩言

如是如所說 諸法無有相 此最爲勝法
我今最後聞 云何向舍衛 所問我何報
阿難佛何在 世眼何時來 我昔往彼處

常見佛世尊 今往彼處空 大智我那住

爾時寂靜轉善男子復向慧命阿難以偈白言

汝於億年哭 此事難可得 阿難汝諦觀

法界難見處 譬如芭蕉莖 葉葉皆除去

其間無有實 法體亦如是 猶如天降雨

普下諸水滴 泡起已還滅 諸有為亦然

如水沫湍聚 有眼者觀見 此處無有實

世相亦如是 譬如鏡中像 其體無有實

三界世相爾 智者莫涕泣

爾時慧命阿難以偈報寂定菩薩摩訶薩言

我非不知此 如汝智者說 三相皆無常

經中大仙說 但此億數天 泣淚皆啼哭

向我邊叫喚 以是生我苦 世尊不久去

捨離我等眼 我等何趣向 誰能救護我

正法從誰聞 寂靜深無比 我今供養誰

嗚呼佛難見

爾時無攀緣菩薩摩訶薩以偈告慧命阿難言

尊者阿難起 但觀法莫憂 法無有來者

亦無有去者 譬如佛有生 證菩提亦爾

譬如轉法輪 涅槃亦如是 諸佛不曾生

亦復不曾滅 如是真法中 阿難何以哭
汝聞我毛孔 出如是諸聲 諸有空寂靜
佛等四種事

爾時慧命阿難以偈白無攀緣菩薩摩訶薩言

大士等不久 各各別刹去 彼國見諸佛
說於甘露法 汝聞彼佛法 甚深諸妙義
見彼佛徒衆 及諸菩薩等 今我億數天
哭泣而圍繞 世尊涅槃已 智者我那住
優婆塞千數 今日承聽我 大苦惱憂悲
我云何慰喻 三十三焰摩 兜率及他化

自在及梵天 如是等天來 云何令歡喜

釋牛王滅後 云何宣彼法 我口云何辯

諸天聞我時 阿難尊何在 彼問我持報

人牛王滅後 一切諸處所 甚深如來住

我於經行林 今在何處所

爾時開敷華神通德善男子以偈白慧命阿難言

我以知汝行 善於三月中 數現身向汝

阿難莫哭泣 自餘千數佛 我告爲汝故

諸佛爲汝說 化作釋種身 諸佛有慈念

以汝好事佛 當來向汝邊 阿難莫大哭

天等諸世間 今日可憂悲 如是大教師
隱寂而不現 如來昔曾說 壽命住億劫

諸行念念滅 我對教師聞

爾時慧命阿難住於佛後三大叫喚而說偈言

眾生所歸者 能與彼等眼 導師入滅後

眾生轉盲冥 勝主阿闍世 聞此不善言

導師入滅後 憂苦云何住 勝人今涅槃

於後力士子 如是等憂惱 悲號大哭泣

彼等集聚已 最後見導師 敬心而尊重

合掌以曲躬 天龍夜叉滿 縱廣五由旬

此處無空缺 人類無入處 雨微妙香華

充滿至于膝 復雨諸末香 供養最勝仙

難陀優波陀 及六十億龍 悉來涅槃處

最後見導師 摩那斯婆論 娑伽羅大龍

聯婁目真陀 各百億圍繞 起雲雨香水

散灑此大地 降大雨而來 最後見導師

諸天雨天華 及雨淨香水 天龍等敬心

供養世尊故 阿耨達龍王 六十俱胝等

雨種種寶雨 到人牛王邊 伊羅鉢啼哭

須彌子大蛇 供養世尊故 最後奉見佛

諸龍有百千	億數那由他	起雲震雷電
來到導師所	彼等注大雨	清淨諸香水
亦為供養故	最後見世尊	夜叉千億數
或百那由他	念佛諸功德	皆來欲見佛
復有四天王	悲泣滿面淚	來至導師邊
最後覲見佛	釋提摩那民	諸天眾圍繞
六十三千數	已來到佛所	彼等雨天華
微妙曼陀羅	及雨栴檀末	供養最勝仙
毗求螺髻梵	二梵眾圍繞	悲泣到佛所
最後見如來	淨居大威力	多百億諸天

號哭到佛所	以佛今涅槃	諸天百億數
種種悲哀泣	勸請大導師	願住於一劫
魔子大智慧	多姿他婆訶	悵快到佛所
勝仙涅槃故	捧執世尊足	偃身勸請佛
願愍世間故	釋王住一劫	世尊若住者
為大仁諸天	當不思議利	請尊住一劫
爾時無鞞緣善男子	以偈告彼一切諸天世人及諸	
梵天王商主魔王子等而說偈言		
汝等悉不知	小兒如獼猴	恒常心放逸
以何號啼哭	譬如猪睡眠	忽起失本念

被刀斫剝時 驚怖馳奔走 我意如是見
汝等皆如此 昔不聞法者 以貪放逸故
今日智慧炬 將滅而不現 及佛猶現在
汝應作善業

爾時世尊告慧命阿難及富婁那須菩提并不空見
王童子迦葉上座大俱絺羅及諸上座今告汝等諸
比丘言將汝右手來與我彼諸比丘聞佛世尊如是
言已卽白佛言善哉世尊爾時諸比丘等滿一千人
各以右手奉授世尊爾時世尊復以左手執彼一切
諸比丘右手執已復以右手執羅睺羅及阿難手付

與諸比丘手中口遺囑曰汝等比丘我阿難賢及羅
睺羅上座今付囑汝等遺囑汝等於如是時出大叫
聲如是叫聲悲號啼哭振動天地甚大可畏而彼大
聲徧此佛刹爾時羅睺羅阿難當付囑時衆中五百
比丘見是事已便捨身命所以者何彼諸比丘不忍
見佛入於滅度彼作是念寧使我等先入涅槃不忍
見此世間大燈世間導師大慈悲父最善知識憐愍
衆生常與世樂今入滅盡我豈忍見爾時於彼刹那
羅婆牟侯多時五百諸佛各住自刹皆伸右手與釋
迦牟尼爾時世尊又以手執阿難羅睺羅上座手付

囑與彼如來手中而說偈言

此我羅睺子 阿難我侍者 今在諸佛前
我付囑此二 於今後夜分 我當入涅槃
更不復見我 天龍及人等 亦無有歸依
救護憐愍者 惟除諸世尊 覆不思議慈
我觀諸世間 不思議無量 不見一衆生
今我爲誰住 無量千數劫 猶如恒河沙
我於如是劫 爲一衆生住 我已利衆生
有信敬心者 自餘無信心 億佛不能化
爾時五百諸佛異口同聲而說偈言

尊已衆生利 尊作佛事已 現種種神通
擊大法鼓竟 已充億衆生 如雲雨潤地
拔衆生毒箭 釋種大仙人

爾時長老阿難慧命羅睺羅兩膝著地以偈白彼諸
佛言

大丈夫勸請 令尊住一劫 以佛威力故
一切見眼者 最勝二足尊 大智住世故
多有衆生信 得利不思議 增長諸天人
阿脩羅減少 聲聞及菩薩 多生不思議
爾時彼五百諸佛告慧命阿難及羅睺羅言汝等善

男子莫大啼哭莫大愁憂本性如是事盡如是真實
如是諸行如是一切有爲法一切作法一切世諦法
悉皆如是盡際如是已捨身命如來行乃無量以世
諦法如是故不得自在又如來者是法身非有爲身
無住世法汝等不應請如來住諸善男子汝等且止
到我佛刹釋迦如來卽時當伸右手當放光明彼之
光明照我刹土照彼土已汝等還來見釋迦佛在汝
等前爲汝說法令汝等聞是故汝等莫大憂愁

地獄品第五

爾時世尊入於三昧住三昧已卽伸右手於右手中

乃至大拇指端及於左手諸身節分乃至千輻輪處
足相之中及手足柔輦網縵相中赤銅色爪甲及以
十指妙色掌文寶手之間皆悉放於百千億光明一
一光明化出蓮華百千億數一一華臺化出師子高
座百千億數一一座上現一佛坐一一化佛教化無
量百千億衆生其間或得漏盡或得離欲地如是一
切諸相好中所放光明事相皆亦如是如是等齋輪
之間及陰馬藏相亦復如是面輪眉間亦復如是爾
時世尊從於頂上放百千種光明一一光明端化出
蓮華百千億數一一華臺化作師子高座百千億數

經 卷一 四十一 三昧經卷一 九
一一座上化一佛坐爲說妙法彼諸如來不說餘法
惟說菩薩密藏修多羅及諸陀羅尼金剛章句爲人
顯說清淨三輪如來諸力無畏法等以彼法門一一
化佛一一說法能淨無量無邊衆生令住不退轉地
向於阿耨多羅三藐三菩提爾時世尊於娑羅雙樹
間右脇師子卧牀中化現一佛右脇而卧化已自身
卽至活大地獄中到彼處已身放光明放光明已其
光徧照活地獄中爾時世尊以此光明照於活大地
獄已而說偈言

此衆生數死 數數還復活 又不捨彼想

故生諸苦惱 此有此聖出 世尊能作明

能說諸正法 滅除諸苦惱 無爲亦無盡

無滅亦無行 若能如是解 彼不墮諸趣

爾時如來說是偈已於彼刹那羅婆牟侯多時令彼
活大地獄三十億數諸苦衆生便得捨身卽捨身已
生於三十三天爾時世尊復至三十三天還說此偈
以佛神力聲徧一切諸大地獄彼地獄趣無量百千
億諸衆生捨地獄身生兜率陀天得生天已還復憶
念前所說法皆得阿那含果爾時彼諸天子得法果
已證法證果入於諸法共說偈言

譬如大曠路 有智慧商主 度脫多衆生
被賊諸獸者 世尊亦如是 無上大商主
能脫億衆生 縛在生死中 我等歸依佛
光明大商主 於我起慈悲 能脫諸苦惱
我等歸依法 我等身已證 我等歸依僧
功德難思議

爾時世尊以涼冷光明普照阿鼻脂地獄處作涼冷
已除滅熱惱一切苦毒成就諸法千數億分能令一
切得喜喜樂愜哀潤益一切衆生安慰柔軟哀憐喜
慶利益衆生合三空門無相無願及以無作告彼地
獄諸衆生等而說偈言

空法及無相 無生及無滅 若解如是法
彼卽脫惡道

爾時八百千億衆生得聞偈已此偈所說三世無礙
是諸法分清淨微妙至衆生耳聞是聲已從於阿鼻
脂大地獄捨地獄身卽生他化自在天宮爾時世尊
住梵天宮復說此偈言

衆生最上樂 無有諸苦處 名相所說處
及諸顛倒想 健兒應當捨 卽免諸苦惱
諸想皆顛倒 及著非色想 三界何有樂

數數流轉生 死已復更生 增長相續苦
 能以智知空 亦不著於空 彼人即知空
 不著知空者 此知法義已 亦復無有我
 既不得於我 此處何有苦 空是無為法
 相亦不可得 能見無我智 此是真佛子
 爾時彼百千億數諸眾生等所生之處即得無漏天
 仙妙果即便憶念宿命之時受地獄苦復念如來丈
 夫功德知報佛恩先取滅度又復不忍見於如來多
 陀阿伽度阿羅訶三藐三佛陀入於涅槃時諸天子
 已得果者異口同聲而說偈言

我等不忍見大慈

調御丈夫入滅度

能為眾生作光明

我不忍見先取滅

作是語已即於此處入於涅槃爾時世尊於彼刹那
 半候多時從梵天宮便自隱身即至娑羅雙樹之間
 爾時世尊作如是念曰我於今日後夜分時入於涅
 槃即是最後見於眾生我今當可令其歡喜滅一切
 苦而受快樂顯現如來大神通力令彼眾生即便得
 入安隱之門欲顯如來無餘涅槃合諸佛意故示神
 通爾時世尊作是念已倚右脇卧猶如師子心無所
 畏觀察十方一切大眾猶大龍象如是觀已即以右

足第一拊指按此大地出大音聲六種震動徧十方
界示現無礙不思議光照耀十方爾時世尊從身諸
相復放光明放光明已一一毛孔復出微妙恒河沙
數微妙光明一一光明徧照恒河沙等諸佛刹土彼
之光明不相雜入無所妨礙如是數數從毛孔中次
第放諸微妙光明如是毛孔各次第復放光明還
復如是徧照如前爾時世尊更復顯現作諸神通現
神通已以佛神力佛護持力令諸衆生皆得具足所
見境界佛眼無異彼諸衆生住此佛刹皆悉覩見如
來光明所照一切諸佛刹土爾時世尊告諸比丘汝

等見彼東方世界有城周圍縱廣一千由旬如是廣
大上下亦爾以諸微塵百千億數滿此圓城汝等見
不諸比丘白佛言如是婆伽婆如是修伽陀我等皆
見佛復告曰汝諸比丘於意云何此微塵數是爲多
不諸比丘言如是如是婆伽婆佛復告言諸比丘若
有人能於諸法中知如是等無爲之法不生不滅無
漏無爲如是知者彼諸衆生得脫諸苦一切惡道當
於爾時有三十億諸衆生等聞此法已卽得阿那含
果既得果已異口同聲而說偈言

無爲法無盡 無漏亦不滅 聖法如是知

我等證寂滅 知以如是得 如實知諸根
爲憐愍衆生 示現因緣法 如來化我等
拔除毒箭病 一切智與藥 及與於涅槃
智炬今速疾 智眼不久滅 億衆苦逼切
從活地獄出 拔箭大醫師 治衆生疾者
能救無數衆 令不墮惡道

爾時世尊立住黑繩大地獄岸上放大光明徧照彼
大地獄拔於彼處無量衆生置於天上如是等熱惱
地獄大熱惱地獄亦皆如是叫喚大叫喚大地獄衆
合大衆合地獄拔出無量無邊衆生安置善道及涅

槃道爾時世尊復以金色光明照入大地獄其光明
力能令衆生所觸身者皆得安樂徧體潤益身心歡
喜苦惱消除眼目所觀心地歡慶快得清涼從慈悲
生令身安隱光明徧照大地獄已滅諸熱惱和輒流
潤彼大地獄所有衆生在大火聚熾然中者與彼樂
故於諸毛孔次第而放如是光明爾時世尊以大光
明普覆一切無量衆生令心柔輒堪任法器具足無
量百千功德以微妙語而說偈言

我與世間樂 解脫諸憂苦 見諸苦逼切
示現涅槃道 我所說諸法 寂靜無畏樂

若能知彼法 此不墮惡道 能歸依佛者
彼人得大利 百千諸劫數 更不見諸苦

現諸佛品第六

爾時如來說此偈已卽於剎那羅婆牟侯多時諸比丘衆及諸衆生多於前數復有無量無邊諸佛右脇而卧師子牀上彼諸世尊從師子牀起還復示現如是神通爾時彼四部衆白佛言世尊此諸佛等皆悉欲於剎那羅婆牟侯多時入般涅槃現神通耶如今世尊所現無異佛告諸比丘如是如是彼諸佛等今日同欲捨最後身入於涅槃彼諸佛等悉皆同名釋

迦牟尼皆於力士所生之地娑羅雙樹卧師子牀今後夜分當入涅槃爾時世尊於南方及西南方西方及西北方北方及東北方東方及東南方上下二方徧告十方諸比丘言汝等比丘見於東方無量無邊諸佛世尊證得阿耨多羅三藐三菩提不諸比丘言如是如是婆伽婆我等皆見以世諦故見非第一義佛復告諸比丘譬如四天下世界微塵悉滿乃至從金剛際至梵天宮諸比丘於汝意云何頗有人知其數不能以譬喻知其數不諸比丘言不也世尊難可得知佛復告諸比丘譬如前所說微塵譬喻如是等

四天下世界如是百千億世界皆悉充滿彼微塵眾
諸比丘彼所有微塵如是等微塵我以肉眼見此世
界諸佛世尊所住在東方如一步地但以肉眼無礙
無分別見前世界如向所說如是南西北方四維上
下亦復如是諸比丘譬如四大天下諸世界若百千
億數滿彼微塵從金剛際至梵天宮所有微塵一一
方面各有若干諸佛世尊一一方面我皆現見此諸
世尊坐於道場或有已坐或始坐者彼等一切諸佛
世尊皆悉同名釋迦牟尼如是復有無量諸佛與然
燈佛同一名號我復見有諸佛世尊名勝一切亦同

名號如是一切諸佛同名蓮華上如是等上佛同一
號者如是上名稱佛同一名者如是拘樓孫佛同一
名者如是拘那含佛同一名者如是迦葉佛同名號
者如是各各佛同名號者我在於此皆悉現見彼諸
佛等各各名號我於世間得最勝法微妙法無極之
法但有能稱名者皆得善根彼等諸佛各各名號如
是無邊如是等諸佛世尊我住於此皆悉現見如是
等現在世間種種名字或入無餘涅槃或現住世轉
於法輪我住於此悉皆現見彼佛世尊於我肉眼無
礙無妨皆現在前諸比丘如來如是復勝此知更復

勝知不可思議更復不可思議無量無邊復無量無邊如是等無量知見諸比丘以是義故如來知見無邊如是無邊不可稱量如是不可稱如是不可思議但以肉眼況復盡於諸佛智法諸比丘譬如此刹所有一切衆生若在家若出家彼諸衆生假使悉成阿耨多羅三藐三菩提具足十力四無所畏彼諸世尊有一善男子能以四事供養承事足滿一劫尊重恭敬種種樂具諸莊嚴事無量無邊不可思議復有善男子善女人等能信我此顯示一切諸佛所說法門乃至一念頃能生實想不起疑心彼人卽於發心之時

時所得功德近諸如來所有功德復勝三千大千世界所有衆生證得諸佛一切智已經劫供養得福雖多不如於此法門生一念信福多於彼若有菩薩信此智者彼之菩薩卽得近諸世尊阿耨多羅三藐三菩提爾時世尊說此肉眼功德之時有六十二億諸衆生迴向阿耨多羅三藐三菩提者還生退心所以者何佛阿耨多羅三藐三菩提難可證故我等但於此處滅盡諸苦取漏盡果復有無量無邊衆生住於學地復有十那由他菩薩成就最初發菩提心復有三十二億諸菩薩等得無生法忍爾時魔王波旬惶

快苦惱泣淚滿面白佛言世尊我爲何事欲令多他
阿伽度阿羅訶三藐三佛陀早入涅槃乃令無量無
邊衆生出我境界今者世尊東方黃晦日未現頃所
作佛事如住一劫若減一劫未能過此利益度脫多
數衆生所謂住於般涅槃道如來今者令我境界悉
皆空虛時魔波旬說是言已佛告波旬汝莫啼哭波
旬汝猶大有不作善業及不信者是汝朋友在汝境
界汝是彼伴爾時世尊卽以甲爪取地上塵告魔波
旬於汝意云何爲我爪上土塵多耶爲此大地土塵
多乎作是語已時魔波旬白佛言世尊指甲上土少

不足言如是語已佛告波旬譬如甲上土塵甚少我
所度衆生入涅槃者復少於此爪甲上土波旬譬如
大地土塵甚多無量無邊在汝境界衆生亦復如是
甚多無量波旬汝莫憂愁應生歡喜何以故衆生在
汝境界多大地土故波旬然諸衆生自作不善去涅
槃遠非汝所爲所以者何但衆生界無有邊際波旬
汝欲所作但當作之如來今日於後夜分當入涅槃
爾時世尊告諸比丘汝諸比丘見此世界諸佛已不
諸比丘白佛言世尊如是婆伽婆我等已見佛復告
諸比丘此諸佛刹復多無量汝等當知見諸佛刹莊

嚴已不復見諸菩薩莊嚴淨土已不復見諸聲聞莊嚴已不諸比丘白佛言世尊如是婆伽婆如是修伽陀佛復告諸比丘如來如是知見復倍上數亦見無量更復無量皆悉了知諸比丘假使我於一劫所說如是佛刹莊嚴之事如我見於十方世界亦復如是假使於一百劫於一千劫億載數劫那由他劫更倍譬喻廣分別說猶不可盡然諸比丘導師所作者爲諸聲聞所作已訖於一切處我已說訖示現內外諸法真心示現皆已說竟諸佛於法無有憍惜無不辦者乃至一莖草等一毛髮許汝等比丘從今已去應

須如法勤而修行我已爲汝示現涅槃我已爲汝說涅槃道已成就衆生善根我所證得阿耨多羅三藐三菩提乃於往昔行大苦行及於難行汝等今者於彼大法具足受持勿令隱沒汝等應作如是修行爾時世尊現大神通十方諸佛所有說法及說法處此刹衆生皆得聞知彼諸如來所有教勅所有衆生承奉教勅皆已證知復有恒河沙數衆生住於三種智復有十億百千諸衆生等發菩提心住於阿耨多羅三藐三菩提復有十百千億那由他諸衆生等住於辟支佛地自餘諸衆生等得漏盡證如是次第無量

無邊阿僧祇不可數不可量不可思那由他諸眾生
聞此法已得大饒益爾時世尊告諸比丘汝等比丘
當知我今不久涅槃汝等應當護持如來教法爲自
利爲他利故汝等諸比丘應當如是修學佛說經已
慧命阿難及天人龍阿脩羅犍闍婆等一切世間聞
佛所說頂戴奉行

四童子三昧經卷下

校訛

第一紙

六行南藏當作

第一紙

十行南藏作

第六紙

三行南藏作

第七紙

九行南藏作

第十八紙

十三行南藏亦

音釋

湍

他端切螺落戈切

悵快

悵丑亮切失志望恨貌

拇

莫厚切

齋

徂奚切

新安居士汪可期同妻氏爲保男汪鶴徵壽

命延長施貴刻此計字六千九百七十九

四童子三昧經卷下筒該銀三兩六錢三分

宛陵釋如圭對上元陶邦本書旌德劉邦瀛刻
萬曆戊午歲仲春月徑山化城寺識

四經同卷

佛垂般涅槃略說教誡經

佛臨涅槃記法住經

佛滅度後棺斂塋送經

般泥洹後灌臘經

佛垂般涅槃略說教誡經

亦名佛遺教經

姚秦三藏法師鳩摩羅什譯

釋迦牟尼佛初轉法輪度阿若憍陳如最後說法度須跋陀羅所應度者皆已度訖於娑羅雙樹間將入涅槃是時中夜寂然無聲爲諸弟子略說法要

汝等比丘於我滅後當尊重珍敬波羅提木又如闇
遇明貧人得寶當知此則是汝大師若我住世無異
此也持淨戒者不得販賣貿易安置田宅畜養人民
奴婢畜生一切種植及諸財寶皆當遠離如避火坑
不得斬伐草木墾土掘地合和湯藥占相吉凶仰觀
星宿推步盈虛歷數筭計皆所不應節身時食清淨
自活不得參預世事通致使命咒術仙藥結好貴人
親厚媿慢皆不應作當自端心正念求度不得包藏
瑕疵顯異惑衆於四供養知量知足趣得供事不應
畜積此則略說持戒之相戒是正順解脫之本故名

波羅提木又依因此戒得生諸禪定及滅苦智慧是
故比丘當持淨戒勿令毀缺若人能持淨戒是則能
有善法若無淨戒諸善功德皆不得生是以當知戒
爲第一安隱功德之所住處

汝等比丘已能住戒當制五根勿令放逸入於五欲
譬如牧牛之人執杖視之不令縱逸犯人苗稼若縱
五根非唯五欲將無涯畔不可制也亦如惡馬不以
轡制將當牽人墜於坑塹如被劫害苦止一世五根
賊禍殃及累世爲害甚重不可不慎是故智者制而
不隨持之如賊不令縱逸假令縱之皆亦不久見其

磨滅此五根者心爲其主是故汝等當好制心心之
可畏甚於毒蛇惡獸怨賊大火越逸未足喻也喻如一人
手執密器動轉不見深坑譬如狂象無鉤猿猴得樹
騰躍踔躑難可禁制當急挫之無令放逸縱此心者
喪人善事制之一處無事不辦是故比丘當勤精進
折伏汝心

汝等比丘受諸飲食當汝服藥於好於惡勿生增減
趣得支身以除饑渴如蜂採華但取其味不損色香
比丘亦爾受人供養趣自除惱無得多求壞其善心
譬如智者籌量牛力所堪多少不令過分以竭其力
汝等比丘晝則勤心修習善法無令失時初夜後夜
亦勿有廢中夜誦經以自消息無以睡眠因緣令一
生空過無所得也當念無常之火燒諸世間早求自
度勿睡眠也諸煩惱賊常伺殺人甚於怨家安可睡
眠不自警寤煩惱毒蛇睡在汝心譬如黑蛇在汝室
睡當以持戒之鉤早屏除之睡蛇旣出乃可安眠不
出而眠是無慚人也慚恥之服於諸莊嚴最爲第一
慚如鐵鉤能制人非法是故比丘常當慚恥勿得暫
替若離慚恥則失諸功德有愧之人則有善法若無
愧者與諸禽獸無相異也

汝等比丘若有人來節節支解當自攝心無令瞋恨亦當護口勿出惡言若縱恚心則自妨道失功德利忍之爲德持戒苦行所不能及能行忍者乃可名爲有力大人若其不能歡喜忍受惡罵之毒如飲甘露者不名入道智慧人也所以者何瞋恚之害則破諸善法壞好名聞今世後世人不喜見當知瞋心甚於猛火常常防護勿令得入劫功德賊無過瞋恚白衣受欲非行道人無法自制瞋猶可恕出家人行道無欲之人而懷瞋恚甚不可也譬如清冷雲中霹靂起火非所應也

汝等比丘當自摩頭以捨飾好著壞色衣執持應器以乞自活自見如是若起憍慢當疾滅之增長憍慢尚非世俗白衣所宜何況出家人爲解脫故自降其身而行乞也

汝等比丘諛曲之心與道相違是故宜應質直其心當知諛曲但爲欺誑入道之人則無是處是故汝等宜應端心以質直爲本

汝等比丘當知多欲之人多求利故苦惱亦多少欲之人無求無欲則無此患直爾少欲尚應修習何況少欲能生諸功德少欲之人則無諛曲以求人意亦

復不爲諸根所牽行少欲者心則坦然無所憂畏觸
事有餘常無不足有少欲者則有涅槃是各少欲
汝等比丘若欲脫諸苦惱當觀知足知足之法卽是
富樂安隱之處知足之人雖臥地上猶爲安樂不知
足者雖處天堂亦不稱意不知足者雖富而貧知足
之人雖貧而富不知足者常爲五欲所牽爲知足者
之所憐愍是名知足

汝等比丘欲求寂靜無爲安樂當離憤內獨處閑居
靜處之人帝釋諸天所共敬重是故當捨已衆他衆
空閑獨處思滅苦本若樂衆者則受衆惱譬如大樹
衆鳥集之則有枯折之患世間縛著沒於衆苦譬如
老象溺泥不能自出是名遠離

汝等比丘若勤精進則事無難者是故汝等當勤精
進譬如小水常流則能穿石若行者之心數數懈廢
譬如鑽火未熱而息雖欲得火火難可得是名精進
汝等比丘求善知識求善護助無如不忘记若有不
忘念者諸煩惱賊則不能入是故汝等常當攝念在
心若失念者則失諸功德若念力堅強雖入五欲賊
中不爲所害譬如著鎧入陣則無所畏是名不忘记
汝等比丘若攝心者心則在定心在定故能知世間

生滅法相是故汝等常當精勤修習諸定若得定者
心則不散譬如惜水之家善治堤塘行者亦爾爲智
慧水故善修禪定令不漏失是名爲定

汝等比丘若有智慧則無貪著常自省察不令有失
是則於我法中能得解脫若不爾者旣非道人又非
白衣無所名也實智慧者則是度老病死海堅牢船
也亦是無明黑闇大明燈也一切病者之良藥也伐
煩惱樹之利斧也是故汝等當以聞思修慧而自增
益若人有智慧之照雖是肉眼而是明見人也是爲
智慧

汝等比丘若種種戲論其心則亂雖復出家猶未得
脫是故比丘當急捨離亂心戲論若汝欲得寂滅樂
者唯當善滅戲論之患是名不戲論

汝等比丘於諸功德常當一心捨諸放逸如離怨賊
大悲世尊所說利益皆以究竟汝等但當勤而行之
若於山間若空澤中若在樹下閑處靜室念所受法
勿令忘失常當自勉精進修之無爲空死後致有悔
我如良醫知病說藥服與不服非醫咎也又如善導
導人善道聞之不行非導過也汝等若於苦等四諦
有所疑者可疾問之無得懷疑不求決也

爾時世尊如是三唱人無問者所以者何衆無疑故
時阿菟樓駄觀察衆心而白佛言世尊月可令熱日
可令冷佛說四諦不可令異佛說苦諦實苦不可令
樂集真是因更無異因苦若滅者卽是因滅因滅故
果滅滅苦之道實是真道更無餘道世尊是諸比丘
於四諦中決定無疑於此衆中若所作未辦者見佛
滅度當有悲感若有初入法者聞佛所說卽皆得度
譬如夜見電光卽得見道若所作已辦已度苦海者
但作是念世尊滅度一何疾哉阿菟樓駄雖說是語
衆中皆悉了達四聖諦義世尊欲令此諸大衆皆得

堅固以大悲心復爲衆說

汝等比丘勿懷悲惱若我住世一劫會亦當滅會而
不離終不可得自利利人法皆具足若我久住更無
所益應可度者若天上人間皆悉已度其未度者皆
亦已作得度因緣自今已後我諸弟子展轉行之則
是如來法身常在而不滅也是故當知世皆無常會
必有離勿懷憂惱世相如是當勤精進早求解脫以
智慧明滅諸癡闇世實危脆無牢強者我今得滅如
除惡病此是應捨罪惡之物假名爲身沒在老病生
死大海何有智者得除滅之如殺怨賊而不歡喜汝

經
佛垂般涅槃略說教誡經
等比丘常當一心勤求出道一切世間動不動法皆是敗壞不安之相汝等且止勿得復語時將欲過我欲滅度是我最後之所教誨

佛臨涅槃記法住經

唐三藏法師玄奘奉

詔譯

如是我聞一時薄伽梵在拘尸城力士生地娑羅雙林與無量無數聲聞菩薩摩訶薩俱并諸天人阿素洛等一切大眾前後圍遶時薄伽梵臨般涅槃愍眾

生故以慈輒音告阿難曰吾今不久當般涅槃一切有爲無不悉捨一切佛事皆已究竟我已宣說離窟宅法妙甘露法最自在法極安樂法是法深妙難解難知不可尋思超尋思境諸大聖者自內所證我又三轉無上法輪其輪威猛具十二相諸餘沙門或婆羅門天魔梵等皆無有能如實轉者我已爲諸天人吹大法螺擊大法鼓覺悟長夜無明睡眠我已爲諸天人建大法幢然大法炬普照一切除滅暗冥我已爲諸有情作大法橋爲大法船濟渡一切暴流所溺我已爲諸有情注大法流降大法雨一切枯槁皆令

潤洽我已開顯解脫正路引諸世間迷失道者若諸
有情我應度者皆已度訖諸未度者皆亦爲作得度
因緣我已降伏一切外道我已摧滅一切邪論我已
傾覆諸魔宮殿我已破壞一切魔軍正師子吼作大
佛事圓滿丈夫本所誓願護持法眼令無毀缺化諸
聲聞授菩薩記爲未來世無上佛眼開照世間常無
斷絕阿難汝等當於如是無上正法勤加護持令不
滅沒阿難我今更無所作唯大涅槃是所歸趣爾時
阿難聞佛語已悲慕感絕良久而言未審如來爲諸
有情三無數劫勤苦所得無上正法於佛滅後住世

幾時饒益天人阿素洛等當漸隱沒

爾時世尊重以慈音告阿難曰諸佛化迹法皆如是
勿復憂悲無上正法於我滅後住世千年饒益天人
阿素洛等從是已後漸當隱沒阿難當知我涅槃後
第一百年吾聖教中聖法堅固我諸弟子聰慧多聞
無畏辯才能伏邪論具大神力於諸有情多所饒益
由是義故天龍歡喜勤加守護國王大臣長者居士
亦復如是善識福田於佛法僧深生淨信供養恭敬
尊重讚歎一百年未有大國王名阿輪迦出現於世
具大威力王瞻部洲建窣堵波高廣嚴飾其數滿足

八萬四千供養吾身所留舍利令無量衆見聞歡喜
皆樹生天解脫之業

我涅槃後二百年吾聖教中寂靜堅固我諸弟子
聰慧多聞如天人師具大威德多所饒益以是義故
天龍歡喜常加守護國王大臣長者居士亦復如是
善識福田於佛法僧深生淨信供養恭敬尊重讚歎
我涅槃後第三百年吾聖教中正行堅固我諸弟子
證慧解脫俱分解脫身證見至無量百千由是多人
得聖果故天龍歡喜常加守護國王大臣長者居士
亦復如是善識福田於佛法僧深生淨信供養恭敬

尊重讚歎

我涅槃後四百年吾聖教中遠離堅固我諸弟子
樂住空閑勤修寂定以是義故天龍歡喜常隨守護
國王大臣長者居士亦復如是善識福田於佛法僧
深生淨信供養恭敬尊重讚歎

我涅槃後五百年吾聖教中法義堅固我諸弟子
愛樂正法精勤修學論議決擇由是義故天龍歡喜
常勤守護國王大臣長者居士亦復如是善識福田
於佛法僧深生淨信供養恭敬尊重讚歎
我涅槃後第六百年吾聖教中法教堅固我諸弟子

多於教法精勤誦習心無厭倦能多饒益無量有情
以是義故天龍歡喜勤加守護國王大臣長者居士
亦復如是善識福田於佛法僧深生淨信供養恭敬
尊重讚歎然於義趣多有懷疑

我涅槃後第七百年吾聖教中利養堅固天龍藥叉
阿素洛等於佛法僧供養恭敬尊重讚歎我諸弟子
多著利養恭敬名譽於增上學戒定慧等不勤修習
我涅槃後第八百年吾聖教中乖爭堅固我諸弟子
多相嫌嫉結構惡人塵坐訕謗輕訶持戒鄙賤多聞
不念六和專思乖爭見不善巧不敬師長不正知住

欺誑誣曲言詞麤獷如旃荼羅依附國王大臣長者
方便損費三寶財物結惡朋黨折挫善人

我涅槃後第九百年吾聖教中專業堅固我諸弟子
多營俗業耕種商估通致使命以自存活於諸如來
所制學處慢緩毀犯

我涅槃後第十百年吾聖教中戲論堅固我諸弟子
多勤習學種種戲論捨出世間諸佛正教所謂契經
應頌記別諷誦自說緣起譬喻本事本生方廣希法
及與論義精勤習誦世間戲論所謂王論賊論戰論
食論飲論衣論乘論我論姪論男論女論諸國土論

諸河海論諸外道論由樂此等種種戲論令諸沙門
婆羅門等輕毀退失我之聖教於我正法毗奈耶中
當有如斯諸惡苾芻苾芻尼等不善修習身戒心慧
更相忿爭謀毀誹謗耽著妙好種種承鉢房舍敷具
由與諸惡徒黨集會雖經多年守護淨戒於須臾頃
悉皆毀犯雖經多年集諸善本由多憂恚悉皆退失
以是因緣天龍等衆悲傷懊惱捨不守護國王大臣
長者居士於三寶所不生淨信誹謗輕毀由是因緣
令正法滅從是已後諸苾芻等造惡轉深國王大臣
長者居士益不恭敬三寶餘勢猶未全滅故於彼時
復有苾芻苾芻尼等少欲知足護持禁戒修行靜慮
愛樂多聞受持如來三藏教法廣爲四衆分別演說
利益安樂無量有情復有國王大臣長者及居士等
愛惜正法於三寶所供養恭敬尊重讚歎護持建立
無所顧戀當知皆是不可思議諸菩薩等以本願力
生於此時護持如來無上正法與諸有情作大饒益
爾時阿難聲聞菩薩天龍藥叉人非人等一切大衆
聞薄伽梵懸記當來法住時分諸苾芻等行業差別
皆增悲歎信受奉行

佛臨涅槃記法住經

佛滅度後棺斂葬送經

失譯人 名 今 附 西 晉 錄

聞如是一時衆祐遊於華氏國阿難以人定時白衆祐言衆祐滅訖之後棺斂尊身其禮云何衆祐曰且自憂身無憂佛也吾滅度後當有梵志理家盡禮葬送阿難言其禮云何衆祐曰如飛行皇帝送喪之儀重曰願聞儀則衆祐曰聖帝崩時以劫波育毘千張纏身香澤灌上令澤下徹以香積身上下四面使其齊同放火闍維檢骨香汁洗盛以金甕石爲甕甕縱廣三尺厚一尺四邊上下各安一枚金甕置中時利

懸繒具供所應起土爲塔華香供養佛當踰彼所以然者吾自無數劫以四等弘慈行六度無極經緯十方拯濟羣生功福隆赫成斯如來無所著正真道最正覺道法御天人師至尊難齊各以把土供養塔者其福無量末世穢濁民有顛沛之命財有五家之分吾以是故留舍利并鉢以禳世顛沛之禍安祐衆生爲宗廟像令民覩則沙門以經道化未聞令生者永去牢獄之酷死者免三塗之罪必獲昇天若爲佛廟當令殊彼阿難言鉢當如之佛言吾鉢者四大天王之所獻也合四以爲一佛所食器羣生慎無以食

矣滅度之後諸國諍之民心邪荒賤命貴婬背孝尊
妖鉢當變化現五色光飛行昇降開化民心黎庶覩
之追存佛德去愚卽明順明正教皆興佛寺旌表佛
德轉當東遊所歷諸國凶疫消歇君民康休穀帛豐
穰欣懌無患終遠三塗皆獲生天極東國王仁而有
明鉢當翔彼王崩之後其嗣姪荒廢眞從邪民心亦
爾覩鉢無肅敬之禮天龍見之悲喜迎鉢還海供奉
王亡尊鉢憂忿交胷布告諸國購鉢千金連年募之
令出首尾民貪重賞徧索不得時有賤人其名曰師
訛作比丘饗餐酒食妻居育子當醉提兒詣宮門言

吾知鉢處王聞大喜請沙門入曰鉢所在乎答曰先
以金來王賜金千斤師曰惟沙門當盜之耳卽下書
拷推諸沙門其毒酷烈臣民覩之靡不怨王王曰爾
爲誰沙門乎答曰吾師事佛王曰佛有何戒師曰有
二百五十戒王曰守戒云何答曰第一當遵慈仁普
惠恩施逮及羣生視天下羣生身命若己身命慈濟
悲愍恕已安彼道喜開化護彼若身潤逮草木無虛
機絕也王曰善哉佛之仁化懷天衷地何生不賴焉
二當遵清無積穢寶尊榮國土非有無篡草芥之屬
非惠不取王曰善哉斯可謂清白者也三當遵貞心

無存姪口無言調偽聲邪色一不視聽觀彼羸人以
母以姊以妹以女寧就燔身無爲姪亂王曰善哉摸
眞景淨佛爲化首矣四當慎言無兩舌惡罵妄言綺
語前譽後誇證入無辜蠱道鬼妖厭禱祝詛寧就吞
炭不出毒聲也王曰善哉佛化惴惴慄慄慎言乃如
茲乎五當絕酒若酒者令君不仁臣不忠親不義子
不孝婦人奢姪厥失三十有六亡國破家靡不由茲
寧飲毒而死不醉而生矣王曰善哉佛之明化令吞
德懷道滅于衆惡興于諸善清淨爲身憺怕爲志經
化令仁而爾教吾令殺戒云守清而爾偷金戒云無

姪而爾畜妻戒當盡誠而爾虛謬沙門云其盜鉢令
吾罪無辜戒無嗜酒而爾醉來外諸沙門有具斯五
德爲高行者不乎答曰其爲凶穢甚於吾矣王問有
司諸沙門何以爲業對曰分衛無度其爲衆穢甚於
彼師矣王曰佛戒有二百五十仁過二儀清等太素
貞齊虛空信若四時明跨日月緣得斯類纂法服偷
應器訛爲沙門亂正眞乎一戒不奉而云二百五十
勅有司曰佛清淨廟賢聖所宗非鳥獸之巢窟逐出
穢濁者無令止佛廟矣國之君子欲興利廟惟無快
賢處中宣佛神化者收淚而止自思大道陵遲神化

經
日衰佛告阿難吾滅度後留鉢及舍利若有賢者肅
心奉養終皆昇天阿難言千歲之末鉢現神德變化
若茲豈況無上正真道最正覺之靈化乎佛說經時
天龍鬼神王臣四輩靡不哽咽稽首而去
佛滅度後棺斂葬送經

般泥洹後灌臘經

西晉三藏法師竺法護譯

聞如是一時佛在舍衛國祇樹給孤獨園與摩訶比
丘僧諸天人民共會座說經阿難前長跪叉手白佛

言天中之天欲有所問願佛說之若佛般泥洹後四
輩弟子比丘比丘尼優婆塞優婆夷四月八日七月
十五日灌臘當何所用佛語阿難灌臘佛者是福願
人之度者各自減錢寶割取珍愛用求度世之福當
給寺然燈燒香用作經像若供養師施與貧窮可設
齋會不可貰許然後不出此爲現世負佛自是心口
所作當得妄語之罪所以者何爲佛設舉作禮以五
種香水手自浴佛師嗵觀咒願當此之時天龍鬼神
皆明證知此人出五家財物侵妻子分用求福利而
反不出當有五罪、三惡道何等爲五一者財物日

切罪

祝詛

祝職救切詛側助切祝謂祝願其事使沮敗也

噉

噉古杏切咽鳥

悲塞也

贄

贄制切贄賸也

噉觀

噉觀唐刺切噉初觀切

蒞

蒞

蒞語具云蒞蒞多此云餽鬼蒞滿計切蒞卽計切



休寧澹石法華庵比丘普慧信士程尚禹施贄全刻此

佛垂般涅槃略說教誡經 佛臨涅槃記法住
臘經 佛滅度後棺欲葬死經 般泥洹後灌
臘經 四經同卷計字六千六百該銀三兩三

錢 天啓丁卯夏月經山化城寺識

范詛
雲生